



PORTAVÓS
VI GOVERN U
KONSTITUSIONÁL



**KOMUNIKADU
BA MEDIA**

Loron 25 fulan-maiu tinan 2015
Dili, Timor-Leste

Timor-Leste realiza melloria importante ida kona-ba jestaun Lixu-isin, ho lansamentu projetu “Prosesu lixu ba Enerjia”, iha Dili

Iha loron sesta, hala’o serimónia ida iha fatin soe fo’er nian iha Tibar hodi halo lansamentu projetu ida ne’ebé sei transforma modelu atuál jestaun lixu-isin nian iha Díli. Empreza Shun Hsin Lda. sei harii konstrusaun no halo operasaun ba “Sistema Fornu Plasma” ida hodi habeen lixu-isin iha prosesu ida ne’ebé foti materiál resiklajen sira no hodi prodús enerjia ba fali gás. Bainhira instalasaun ne’e halo operasaun loloos ona, bele prodús enerjia ba sentráel elétrika ida ho kapasidade eletrisidade nian hamutuk megawatt 25.

Lansamentu ba projetu ne’e, nu’udar pasu signifikativu ida hodibele rezolve problema sira kona-ba jestaun lixu-isin nian ne’ebé daudaun ne’e identifika ona iha avaliasaun ida hosi Banku Dezenvolvimentu Aziátiku (ADB). Loroloron lixu soe iha fatin so’e foer nian iha Tibar iha maizomenus tonelada 120. Ho populasáun Díli dadaun ne’e besik to’o ona rihun 260 resin, númeru ne’e sei aumenta ba beibeik, no ho aumentu dezenvolvimentu indústría, agrikultura, komérsiu, produsaun lixu-isin iha sidade sei aumenta mós.

Governu, liuliu Ministériu Komérsiu, Indústría no Meiu Ambiente, halo ona planu hodi jere dezafiu hirak ne’e, la’ós de’it liuhosi hadi’a eliminasaun lixu-isin, maibé mós liuhosi programa hirak ne’ebé buka atu hanorin sidadaun no empreza sira hodibele hamenus liután sira nia produsaun lixu nian tuir sira nia bele.

Iha diskursu ne’ebé nia hato’o iha serimónia ne’e, Primeiru-Ministru Timor-Leste nian, Dr. Rui Maria de Araújo, hatete katak “lansamentu projetu “Prosesamentu lixu ba-ihá enerjia” sei hatán ba prekusasaun boot ida iha ita-nia sékulu, maka sustentabilidade ambientál”, hodi hatete liuliu katak “ kestaun lixu nian sai hanesan dezafiu ida ne’ebé bele fó mós oportunidade. Lixu mós iha ninia folin”, nia hatete, hodi hakotu katak “iha kazu ida ne’e, mós hanesan biban ida atu hala’o atividade ekonómika nian sira ne’ebé bele fó serbisu ba comunidade.”

Projetu ne’e sei kria postu serbisu nian maizomenus 300 no sei haree liu kona-ba formasaun no profesionalizmu traballadór sira nian.

Primeiru-Ministru agradese ba comunidade Tibar nian ba sira nia “ espíritu sidadania ne’ebé loloos” bainhira konkorda ho konstrusaun indústría prosesamentu lixu nian, “ hodi kontribui atu hadi’a qualidade moris ba timoroan hothotu.”



Ágio Pereira

+670 7723 0011

agio.pereira@cdm.gov.tl

govtlmedia@gmail.com

www.timor-leste.gov.tl

Iha loron-sesta ne'e, entre orador sira iha serimonia ne'e nian iha mos Ministru Planeamentu no Investimentu Estratejiku, Kay Rala Xanana Gusmao no mos Administrador Munisipal Likisa nian.

Prezidente empreza Shun Hsin Lda., Lin Gi-Hsiung, apresenta projetu ba sira hotu ne'ebé mak iha ne'ebá. Ida ne'e hanesan investimentu boot ida, ne'ebé maka sei orienta husi tekniku husi Taiwan ne'ebé iha ona esperiensa iha "Sistema Fornu Plasma". Bainhira instalasaun ne'e hahu funsiona ona, empreza sei fornese kamiaun foun 22 atu rekolla lixu-isin iha Dili.

Portavos Governu nian, Ministru Estadu hatete katak, "prosesu ida ne'ebé lori benefisiu ba-iha area saude no ambiente nian, kria empregu no prodús enerjia renovavel hanesan notisia di'ak ida ba Timor-Leste".

REMATA



Ágio Pereira

+670 7723 0011

agio.pereira@cdm.gov.tl

govtlmedia@gmail.com

www.timor-leste.gov.tl